

Uunga siunnersuut: Procenti aaqqiissutissaq pillugu Inatsisartut inatsisaat nr. xx, xx. xxx 2017-imeersoq
(Aningaasaqarnermut Akileraartarnermullu Naalakkersuisoq)

Saqqummiussissut

(Aningaasaqarnermut Akileraartarnermullu Naalakkersuisoq)

Siullermeerinnineq

Matumuuna Naalakkersuisut sinnerlugit procenti aaqqiissutissaq pillugu Inatsisartut inatsisissaattut siunnersuut saqqummiuppara.

Ullumikkut inatsisit atuuttut ilaanni innuttaasunut aningaasat tunniunneqartartut ukiumoortumik nalimmassarneqartarnerinik qulakkeerisunik malittarisassaqaarpoq. Tamanna assersuutigalugu utoqqalinermi pensionisiaqarnermut atuuppoq.

Aningaasalli tunniunneqartartut ilaat nalimmassarneqarneq ajorput, tamatumalu aningaasat tunniunneqartut kigaatsumik naleerukkiartortarnerat inernerisarpa. Tamanna assersuutigalugu meeqqanut tapiissutinut, meeqqanut akilersuutinut kiisalu akileraarutit akitsuutillu ilaannut atuuppoq. Innuttaasut nalimmassarneqarneq ajortunit pisortanit ikiorserneqartut aningaasaqarnermik tatineqariartuinnarnera misigisarpaat, taakkumi pisisinnaassusiat annikilliartuinnartarpoq. Taamaattoqarneratigullu inuiaqatigiinni naligiinnginneq kigaatsumik annertusiartortarpoq.

Tamanna Naalakkersuisut maanna iliuseqarfigaat. Inatsisissatut siunnersuut manna aqutigalugu pisortat ikiorsiissutaannik isertitat il.il. nalimmassarneqartarnerannut ataatsimut toqqammavissat malerugassiuunneqarput. Nalimmassaaneq ukiumut ataasiarluni pisortat suliffeqarfiini akissarsiat qaffariaataasa assingannik procentimik iluarsiinikkut pisassaaq. Taamaaliornikkut inuiaqatigiinni innuttaasut pisortanit ikiorsiissutinik pissarsineq ajortut, innuttaasullu annikinnerusumik annertunerusumilluunniit ikiorsiissutinik taamaattunik pinngitsuuisinnaanngitsut aningaasaqarnikkut naligiinngikkiartornerat illuatungilerneqassaaq.

Pisortanilli ikiorsiissutit arlallit kisimik manna tikillugu ataavartumik nalimmassarneqarsimasuunngillat. Aammattaaq akileraarusiissutit akitsuutillu arlallit ukiut ingerlaneranni nalimmassarneqarsimangillat. Akileraarusiissutit akitsuutillu naleerukkiartorneri pisortat missingersuutaannik tatisipput.

Siunissami ukiumut ataasiarluni procentimik aaqqiissutaasumik, Naatsorsueqqissaartarfimmit naatsorsorneqartumik, tamanut saqqummiussisoqartarnissaa inatsisissatut siunnersuutikkut

siunniunneqarpoq. Procenti aaqqiissutaasoq pisortani akissarsiat ineriartornerat aallaavigalugu naatsorsorneqartassaaq.

Procenti aaqqiissutaasoq siunissami pisortat ikiorsiissutaannik kiisalu akileraarutinik akitsuutinillu nalimmassaanermi toqqammaviusassaaq. Pisortat ikiorsiissutaat suut kiisalu akileraarutit akitsuutillu suut procentimik nalimmassaataasumik nalimmassarneqartassanersut, inatsisissatut siunnersuutikkut allakkut, UKA 2017-imi saqqummiunneqartussatut ilimagineqartumi isummerfigineqassaaq.

Pisortat ikiorsiissutaannut tunngatillugu, taakku nalimmassarneqarnissaat maanna naalackersuisoqarfiit akimorlugit isumaginninnikkut akileraartarnikkullu atortorissaarutit ataqatigiissinniarneri unammillernartut misissorneqarnerisa naammassineqareernerini isummerfigineqassapput.

Siunnersuummissaaq ”maannakkorpiaq isertitat” oqaaseq ilaatinneqarpoq. Aalajangersakkami inatsisit assigiinngitsut akimorlugit ”massakkorpiaq isertitat” assigiiartumik qanoq paasineqartarnissaa siunertarineqarpoq.

Naggataagullu inatsisissatut siunnersuut Naalackersuisut Napatitsinermut Siuariartornissamullu Pilersaarutaanni siusinnerusukkut eqqartorneqareenera ilanngullugu paasissutissiissutigineqassaaq, tassani aaqqissuusseqqinnissamut toqqammavik 4-mi suliniut 4-6 ataani allassimavoq.

Naggaterpiaagullu inatsisissatut siunnersuut tassungalu nassuiaatit innersuussutigissavakka.

Taama oqaaseqarlunga Naalackersuisut sinnerlugit siunnersuut Inatsisartunut oqallisigisassanngortippara.